



Minggu, 13 Juni 2021
Ogen: Esekiel 3: 10-15



Kesah Dibata ngangkat ahu



Dibata si ndilosa, Dibata si nikapkeca. Dibata si milihsa, Dibata si mpengasupsa. Dibata si netapkenca, Dibata si mperlengkapisa. Si lit ibas diri nabi Esekiel eme ukur si patuh dengen kininggiten ngenca. Uga nina Dibata nggit ia ndalankenca, ia labo dekahen nungkun bahkan ngukur-ngukurisa alu gegeh kengasupenna. Labo pernah ia nungkun man Dibata "uga ka cara kari aku seh ku ingan kalak buangen e Tuhan? Nca uga kari aku ngerana?" tapi, idalanina saja alu patuh perintah Tuhan, ikut-ikutna uga pemabai Dibata kempak ia, janah tek ia maka asum ia enggo ipake Tuhan, kerina si lit ibas dirina iperlengkapi Tuhan guna mpeseh berita ibas Dibata nari man bangsaNa Israel. Kuasa Tuhan reh ku Esekiel alu megegeh, ibabai kesah Dibata ia. Terangkat me ia janah terbegini sora arah pudina bagi sora si megegeh guna nehken kemulian man Dibata. Bage me cara maka nggo seh ia i Tel Abib i tepi Lau Kebar jumpa me ia ras kalak buangen ndai. Ia pe kemamangen atena bana, sebab labo sedarina kai si edenga jadi. Tapi enggo me ia seh ku bangsa ija ia arus erberita. Tentu pengalamen luar biasa si igejapken Esekiel e mereken man bana kinipaguhen tekad tole. Adi ibas cara si la iangkana pe Dibata banci mabai ia ku Tel Abib jumpa ras bangsa Irael e, tentu ibas ia erberita si la iangkana cara pe banci nge ia ngasup ibahan Dibata. Bage me pitu wari dekahna ia erberita nuriken kebenaran Kata Dibata man bangsa e.

Kita moria, alu latar belakang si berbeda, bagepe kondisi si genduari enda alu situasi si man hadapen pe si pelain-lain. Ipake Dibata erberita ibas erberita alu cara si iberekenNa man banta. Mari sipakeken "keheranen" e guna naksiken kemulian Dibata ibas kegeluhenta, man jabunta, man sekelewetta bagepe temanta moria ibas kepulungenta. Bahanlah maka geluhta idemi ras ikuasai Kesah Dibata seh maka kai pe sijadi ibas kegeluhen enda ngasup kita ngaloken ras ngalakensa, la kita surut ibas erkiniteken sebab gegehta kesah si badia sibengket kubar geluhta. Iangkat kesah Dibata e kita seh maka tetap jadi si permenang.